


TEZĂUR LITURGIC

26 FEBRUARIE

**ACATISTUL
SF. MUCENIȚE
FOTINIA
SAMARINEANCA**



MOSCOVA, 2000



Акафист мученице ФОТИНИИ САМАРЯНЫНЕ

Кондак 1

Избраннице Христова, святая мученице Фотиние, пришедшая ко кладезю Иаковлю почерпнути воду и обретшая Мессию, Имущаго воду живу, похвальная восписуем ти, с любовию чтущии святую память твою, поюще: радуйся, мученице Фотиние, ко кладезю веры нас приводящая.

Икос 1

Ангелов Творец избра ты, достоблаженная Фотиние, имела бо еси сердце, исполнено правды Божия и готовое восприяти глаголы жизни вечныя. Тако и Спасителю твоему отвечала еси: «Господи, даждь ми воду сию, да ни жажду во веки!» Мы же, дивящиеся велией ревности твоей по Бозе, со умилением зовем ти:

Радуйся, сердце отверстое истине имевшая.

Радуйся, веру отцев свято хранившая.

Радуйся, беседы со Христом удостоенная.

Радуйся, верою во Христа просиявшая.

Радуйся, яко слово Его восприяла еси.

Радуйся, яко глаголом Божиим душу свою преобразила еси.

Радуйся, слова Христова проповеднице.

Радуйся, ко овцам стада Христова сопричтенная.

Радуйся, мученице Фотиние, ко кладезю веры нас приводящая.

Кондак 2

Видя сердцеводец Господь греховность жития твоего, обаче и простоту души твоея, изволи открыть тебе, яко глаголай с тобою Мессия есть, Егоже чают языцы. Ты же, оставивши водонос и шедши во град свой Сихарь, возвести чудо сие всем людям, да вкупе с тобою зовут: Аллилуиа.

Икос 2

Разум богопросвещен приявши, Фотиние блаженная, уразумела еси суету мира сего и избрала еси едино души твоей на потребу – еже благоугождати Богу. Темже, благоразумие твое похваляюще, взываем сие:

Радуйся, познания истинныя веры
вожделевшая.

Радуйся, яко источником воды, текущей в жизнь
вечную, соделалася еси.

Радуйся, яко от последних к первым причислена
еси.

Радуйся, житие греховное на житие праведное
пременившая.

Радуйся, всем сердцем Христа возлюбившая.

Радуйся, на пажити Христовой упасенная.

Радуйся, глаголам жизни вечныя наученная.

Радуйся, верою своею многия преобразившая.

Радуйся, мученице Фотиние, ко кладезю веры
нас приводящая.

Кондак 3

Силою благодати Христовы одеявшееся и
восприявши свет истинныя веры, соделалася
еси источником света посреде народа своего,
научая его воспевати Богу: Аллилуиа.

Икос 3

Имуще сердце свое словесам Христовым
отверсто, остави водонос свой и иде во град
святая Фотиния и рече человеком: «Приидите и
видите Человека, Иже рече ми вся, елика
сотворих: еда Той есть Христос?» Людие же
приидоша ко Христу и моляху Его, дабы пребыл
у них; и много паче вероваша за слово Его. Мы
же, мученице Фотиние, прославляя в тебе
Господа, вопием сице:

Радуйся, истину православных веры познавшая.

Радуйся, ученицею Христовою соделавшаяся.

Радуйся, страх Божий в сердце своем
стяжавшая.

Радуйся, Промыслом Божиим избранная.

Радуйся, образ Божий в себе возродившая.

Радуйся, яко и нас зовещи ко обновлению.

Радуйся, для спасения самарян Христом
предреченная.

Радуйся, и нас истинам Христовы веры
научающая.

Радуйся, мученице Фотиние, ко кладезю веры нас приводящая.

Кондак 4

Бури греховныя избавляя, избра тя Господь, блаженная Фотиние, послужити делу обращения на путь спасения самарян, бывших доселе язычниками, да просвещении светом истины, воспоют Богу: Аллилуиа.

Икос 4

Слыша сердцем своим благовестие о поклонении Богу в душе и истине, оставила еси греховное житие, святая Фотиние, и соделалася еси проповедницею Слова Божия вкупе со чады и сестрами твоими. Мы же дивящися таковой силе веры твоея, возглашаем ти гласы немолчными сие:

Радуйся, Фотиниею, сиречь «светозарною», нареченная.

Радуйся, светом истинныя веры весь мир облиставшая.

Радуйся, правде сердечней нас научающая.

Радуйся, грехи своя зрети нам помогающая.

Радуйся, к свету истинному нас приводящая.

Радуйся, покланяться Богу в душе и истине
вразумляющая.

Радуйся, благовонное веры кадило.

Радуйся, православныя веры светило.

Радуйся, мученице Фотиние, ко кладезю веры
нас приводящая.

Кондак 5

Боготечною звездою явилася еси, святая
Фотиние, и от земли Самарийския даже до
Карфагена просветила еси верою Христовою вся
живущия тамо, научающи их пети Творцу:
Аллилуиа.

Икос 5

Видевше многия подвиги и труды твоя, ихже
тридесять лет совершала еси во славу Господню,
многия чрез тебе от языческаго мудрования ко
Христу приидоша. Мы же, дивящиеся таковому
мужеству немощнаго женскаго естества, во
умилении сердца зовем ти:

Радуйся, жизни греховныя мужественно
отрекшаяся.

Радуйся, на путь спасения многия наставившая.

Радуйся, всем житием своим Христу
послужившая.

Радуйся, суету мира сего ни во чтоже
вменившая.

Радуйся, Бога познавшая и Богом знаемая.

Радуйся, познавати волю Его научающая.

Радуйся, все упование на Господа возлагати
наставляющая.

Радуйся, всякое зло добром победившая.

Радуйся, мученице Фотиние, ко кладезю веры
нас приводящая.

Кондак 6

Проповедницею словом и делом истины
Христовы явилася еси, святая Фотиние, и чада
своя, ко Христу приведши, благовествованию
научила еси. Они же, имуще велие дерзновение
к проповеданию Слова Божия, многия ко Христу
приведоша, воспевая купно с ними: Аллилуиа.

Икос 6

Возсия паче солнца светлейше слово твоея
проповеди, блаженная Фотиние, егда пред
злочестивым императором Нероном, яко

ученица апостола Павла, со клеветы своими представ, о Христе небаязненно благовествовала еси. Мы же, дивяся таковой силе духа твоей, воспеваем ти тако:

Радуйся, исповеднице Христова, мучений не убоявшаяся.

Радуйся, добрую искру души своея в пламя ревности по Бозе возгревшая.

Радуйся, яко жестосердаго Нерона верою во Христа просвещала еси.

Радуйся, яко душу злодея сего привести ко спасению тщалася еси.

Радуйся, истинною любовью ко благочестию горевшая.

Радуйся, делателей на ниве Христовой приумножившая.

Радуйся, душу, приявшую благодать Христову, имевшая.

Радуйся, слово, благодатныя силы исполненное, людем несшая.

Радуйся, мученице Фотиние, ко кладезю веры нас приводящая.

Кондак 7

Хотя наследницею Царствия Своего соделати ты, избраннице Христова, за готовность сердца твоего пострадати за Него до конца, Всемиловитый Господь явился ти, да укрепишия во предстоящих страданиях и вопиеша Ему: Аллилуиа.

Икос 7

Новую благодать и силу в тебе увидев, удивися Нерон мужеству твоему, Фотиние всехвальная, и предаде ты на крепчайшия мучения; паки же удивися, видя неуязвимость твою и безсилые истязавших ты. Мы же, разумея Божие попечение о тебе, вопием:

Радуйся, крест Христов на рамо свое, яко иго благое, взявшая.

Радуйся, рукою Христовою от истязателей защищенная.

Радуйся, яко силою Божиею мучителей своих безсильными соделала еси.

Радуйся, яко веру христианскую среди язычников прославила еси.

Радуйся, силою Божиею свыше вооруженная.

Радуйся, силам тьмы противостати благодатию Божиею возмогшая.

Радуйся, христиан неувядаемый цвете.

Радуйся, мучеников красото и забрало.

Радуйся, мученице Фотиние, ко кладезю веры нас приводящая.

Кондак 8

Странно бысть неверующим во Христа ведети, яко не оставляет Господь избранных рабов Своих: явился бо Христос чадом твоим, Фотиние, и возвести Виктору: «Отныне имя тебе будет Фотин – светозарный, ибо многия, просвещеннии тобою, обратятся ко Мне»; Севастиана же Господь ободри тако: «Блажен, иже совершит подвиг свой до конца». Они же укрепленни на страдания за Христа, единым духом воспеша Богу: Аллилуиа.

Икос 8

Вся пламенея любовью ко Христу, паче всех благ земных Его возлюбила еси; представ же купно со чады своими неправедному судии, даже до смерти мученическая верною пребыла еси Спасителю твоему. Мы же, умиляся велией любви твоей к Богу, возглашаем ти тако:

Радуйся, благодати Христовы преисполненная.

Радуйся, люби Его паче живота своего нас научающая.

Радуйся, силу вражию добре победившая.

Радуйся, видя мучения чад твоих, в вере не поколебавшаяся.

Радуйся, и иных исповедников на подвиги укреплявшая.

Радуйся, за вся благодарити Бога вразумлявшая.

Радуйся, яко еси на тверди неба церковного лучезарное светило.

Радуйся, яко еси христианом в напастех твердое прибежище.

Радуйся, мученице Фотиние, ко кладезю веры нас приводящая.

Кондак 9

Все естество Ангельское и лица святых удивишася непоколебимей вере твоей во Христа, зряще на мученическую кончину твою, страстотерпице Христова Фотиние, и радостно ты сretoша, егда во врата Царствия Небеснаго вошла еси, воспевая: Аллилуиа.

Икос 9

Витий глаголы не возмогут по достоянию восхвалити подвиги и труды твоя, достоблаженная Фотиние, како благодатию Божиею победивши козни врага рода человеческого и посрамивши прелесть идольскую, многия ко Христу привела еси. Мы же благоговейно возносим ти похвалы сия:

Радуйся, вся красная мира сего презревшая.

Радуйся, спасти душу свою паче всего вожделевшая.

Радуйся, и нам, грешным, надежду на спасение дарующая.

Радуйся, прошениям нашим милостиво внемлющая.

Радуйся, православных христиан пред Богом всемогущая заступнице.

Радуйся, наша пред Богом несумненная ходатаице.

Радуйся, руку помощи пребывающим во тьме заблуждений подающая.

Радуйся, крепкое упование имети на Бога всех научающая.

Радуйся, мученице Фотиние, ко кладезю веры нас приводящая.

Кондак 10

Спасти хотя душу свою, о теле твоём не радела еси, страдальце Христова Фотиние, и всю себе в жертву благовонную Богу принесла еси, да возможши в селениях праведных воспевати Творцу: Аллилуиа.

Икос 10

Стена еси и прибежище спасительное всем молитвенно к тебе притекающим и пред иконою твоею тепле молящимся: тебе бо дарова нам Всемилостивый Господь в помощь и врачевание от болезней душевных и телесных. Сего ради приносим ти сиецевая:

Радуйся, веры Христовы неистощаемое сокровище.

Радуйся, жизни вечная достойная наследнице.

Радуйся, в любви к Богу пример всем явившая.

Радуйся, апостолам в проповеди Евангелия себе уподобившая.

Радуйся, упованию на Бога нас научающая.

Радуйся, путь к подвигу христианскому нам указующая.

Радуйся, яко в доброделании нас укрепляеши.

Радуйся, яко в познании истины нас умудряеши.

Радуйся, мученице Фотиние, ко кладезю веры нас приводящая.

Кондак 11

Пение умиленное на всякий час Богу приносила еси, святая Фотиние, наипаче же в последния дни жития своего, егда по повелению зверонравнаго Нерона, безчеловечно истязавшаго тя, в кладезь глубокий ввержена была еси, в немже, яко в чертозе брачном, воспевала еси Богу: Аллилуиа.

Икос 11

Светозарною свещею на свещнице церковней сияеши, Фотиние всеславная, светом благодатным прогоняя тьму греховную от всех жаждущих спасения. Мы же со упованием и надеждою на милосердие Божие к нам, грешным, восхваляем мученическую кончину твою и радостно взываем ти:

Радуйся, до конца крест Христов достойно пронесшая.

Радуйся, злочестиваго Нерона неистовство посрамившая.

Радуйся, яко во обители Небесныя вселилася еси.

Радуйся, яко Царство Небесное унаследовала еси.

Радуйся, в ризу Христову одеянная.

Радуйся, райскою славою увенчанная.

Радуйся, яко в горниле скорбей душу свою очистила еси.

Радуйся, яко блаженство нескончаемое наследовала еси.

Радуйся, мученице Фотиние, ко кладезю веры нас приводящая.

Кондак 12

Благодать от Бога дана ти есть, мученице Фотиние, обращати неверующих к вере Христовой, укрепляти маловерных и исцеляти болящих от различных болезней. Сего ради буди теплою молитвенницею пред Богом и о нас,

почитающих святую память твою и
воспевающих о тебе Богу: Аллилуиа.

Икос 12

Поюще славное служение твое Христу, крепкую веру, мужество и терпение во страданиях за Него, ублажаем святую кончину твою, Фотиние светозарная, и, яко живей ти сущей с нами, из глубины души взываем сие:

Радуйся, пред Престолом Всевышняго наша ходатаице.

Радуйся, чтущим память твою покровительнице.

Радуйся, призывающих тя на помощь скоро слышащая.

Радуйся, светом трисолнечным сердца наша просвещающая.

Радуйся, грехи наша видети нам помогающая.

Радуйся, на пути спасения нас утверждающая.

Радуйся, яко со апостолы и всеми святыми на Небеси торжествуеши.

Радуйся, яко вечныя жизни достигнути нам вспомооществуеши.

Радуйся, мученице Фотиние, ко кладезю веры нас приводящая.

Кондак 13

О всехвальная мученице Фотиние, свет веры Христовой людям несущая и от Христа Небесною славою увенчанная! Приими от нас, грешных, малое моление сие, тебе приносимое, и моли Бога, да утвердит и нас в православней вере и в соблюдении заповедей Его, да и мы со всеми праведными и святыми в день Судный обрящем милосердие Господа нашего Иисуса Христа и в радости воспоем Ему: Аллилуиа.

(Этот кондак читается трижды, затем икос 1 и кондак 1)



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО